



ル 5
3014
2



水攷第五



東南為澤國三江五湖萬水所湊治之則為民利不
治則為民害其勢然也欲興東南地利者治田之後
即宜講求治水之法而治水之要其說亦有三焉一
曰開決三江故道以泄震澤之水二曰浚治諸浦以
泄江湖之水三曰疏導涇港以泄田中之水三者備
而東南之水庶乎其不為患矣何謂開決三江故道
三江之跡考究已悉語在三江考中然自今觀之太
湖東入松江出吳江長橋自宋以前湖水入江江流
入海未有隄障也慶曆間築挽路建長橋以便公私

昭和九年
九月十三日
購求

漕運而江流始噎湖水始壅蘇文忠公嘗進狀言其利害單鏐水利書議欲鑿吳江岸為木橋千所以通江湖其言善矣自後屢有開浚皆為民利我朝夏忠靖公侍郎徐公常做其說而行之已有成效然今之議者猶蹈襲前說復以湖水東流不快必欲決長橋以通松江是泥古而不知今知彼而不知此也蓋長橋之水今不為不通而所以為東吳之害者則在於下流入海之處一有不通積水泛濫乃為沴耳初不係於長橋也若復決去長橋使湖流浩至而入海之處又去水不疾則吳江崑山常熟三縣之地皆為深

淵矣此松江不可盡決利害甚明也東江舊跡在太湖西北為爛路港澱湖西有急水港白蚬江皆東江之西段也澱湖之東有出水港斜瀝口泖港口小漕港大瀝口小瀝口通潮水往來潮退則引湖水下大漕大盈等浦入青龍蟠龍江而出海皆東江之東段也今諸港皆淺狹壅遏不通潮汐而東江入海之處遂塞東南風水回太湖則湖州諸縣皆泛溢西北風太湖水下澱山泖湖則崑山常熟吳江松江等處泛溢是皆東江不通之害也今之言東江所以塞而不通者大率歸咎於黃浦奪權海塘障遏而不知江之

通塞亦自有時黃浦海塘未必能為東江害也或以為東江既塞而澱湖之水由千墩等浦北入於吳淞江殊不知澱湖之水自屬東江其北入於吳淞江者但支流耳遂以為可泄澱湖之水者非也苟能尋東江之舊而疏治之使澱湖所受之水皆得達於東南以入海則松江可通而數百年之害可去萬世之利可興神禹之功可續矣其婁江今名吳淞江自龐山湖北經大姚浦又北折而東過崑山南九里又東過嘉定由松江東口入海其間屢經開浚東自顧浦西至界浦壹百餘里宋嘉祐間所開謂之新江元大德間都水任仁發開吳淞江西自上海縣界吳松舊江東抵嘉定石橋浜遷迤入海三十八里至我

朝永樂中夏忠靖公治水東南以為夏駕浦抵上海縣南鎗鋪口可百三十餘里潮沙漲塞已成平陸難以施工乃浚崑山之夏駕浦新洋江嘉定之顧浦安亭浦北貫吳塘皆入於劉家港以入海此蓋由吳淞江中塞故北通劉家港入海也正統間周文襄公浚顧浦以通吳淞江入海天順間都御史崔公浚吳淞江自夏駕口東至白鶴江卞家渡莊家涇出舊江共壹萬叁千柒百餘丈成化間都御史畢公復修崔公

之功嘉靖改元尚書李公復開吳淞江及夏駕等浦而入海之道皆通迄於今十有餘年渾潮往來沙漲漸積江流漸狹失今不治將復壅塞工愈難而害愈深矣是宜沿江相度於兩岸沙漲之所及時挑浚開通則震澤之水有所歸宿而不為害矣三江利害大略如此何謂浚治諸浦吳郡之地北枕揚子江東通大海西控太湖南襟三江水之發源則自太湖東注三江以入海又其支流北達揚子江以入海故古人於東北沿江海之所浚三十六浦以分三江之勢使同歸於海其常熟之浦二十有四黃泗浦奚浦西成浦東成浦水門浦耿涇浦魚磳浦鄔溝浦塘浦高浦金涇浦石幢浦陸河浦北浦甘草浦千步涇司馬涇金涇錢涇黃鶯漕白茆港福山港許浦崑山之浦十有二掘浦下張浦七鴉浦茜涇浦楊林浦六鶴浦顧涇浦川沙浦五岳浦蔡浦琅港浦瓦浦弘治間割崑山常熟東北境置太倉州而三十六浦今半屬之太倉矣自元宋以來屢議開浚或二三而止未有能盡復其舊者今三十六浦之中入海者惟茜涇七鴉白茆楊林為最大入揚子江者惟福山許浦為最大永樂中夏忠靖公開濬白茆景泰中侍郎李公敏繼之

弘治中侍郎徐公貫又繼之且決白魚洪鮎魚口以
入海踰三十年是為嘉靖改元尚書李公克嗣復大
浚白茆以泄崑承諸湖之水起自常熟東倉抵鮎魚
口湖漕橫瀝姚浜灣直抵海口九十餘里當時即中
林文沛任其事其所經畫最為周悉弘治九年主事
姚文灝開七鴉港東通七浦塘以洩楊城諸湖之水
並為民利楊林塘東北入海往往淤塞不時開浚其
餘諸浦或通或塞故道悉存苟能相度其跡審究其
宜次第舉行以時開浚則郡中東北之水皆北入於
江東入於海矣今白茅浚後已經十餘年通達無阻
為利甚博然當江海潮汐之衝未免沙漲積累之患
所以防之於未然以為經久之規者正今日之所宜
講也又七浦塘迤東木梳灣今皆淤漲淺狹而直塘
兩岸向所開闢者亦已壅闕則陽城諸水之入七鴉
漸有所窒碍恐復經歲不修則為患不小而施工亦
大愈久愈難矣所以治之於萌蘖使不遺斧柯之力
者允今日之所宜急也吳淞江之南有大浦三十六
條東自北平浦破江浦艾祈浦顧匯浦養蚕浦太盈
浦南鮮浦梁紇浦石臼浦直浦分桑浦趙屯浦內薰
浦石浦道福浦蕭市浦金窰浦千墩浦洼浦張潭浦

棠梨浦同丘浦諸天浦張浦帆歸浦角直浦甫里浦
渡頭浦東齋浦剝力浦界浦浮高浦順德浦大姚浦
破墩浦盞頭浦吳淞江之北有大浦三十二條東自
顧浦安亭浦徐公浦北鮮浦瓦浦三林浦顧墓浦金
城浦木瓜浦夏駕浦天明浦廣浦社城浦新洋江馬
仁浦小虞浦大虞浦尤涇浦梁里浦華翔浦心瀆浦
樂浦薛莊浦黃瀆浦真義浦界浦下里浦戴壩浦上
顧浦青丘浦奉里浦任浦其在江之南者則西受陳
湖等水東受澱山湖諸水以入吳淞江而達于海其
在江之北者則西受陽城湖諸水橫絕至和塘以入
吳淞江而達于海自新洋夏駕以東則反納吳淞江
之水以東北趨於劉家港而入海吳淞江迤東入海
口江之南有朱墅浦淮浦華潮浦赤眼浦西舊江周
涇儼倘浦盤龍浦小許浦魚浦新涇西盧浦大盧浦
上海浦南鎗浦古江青浦戴家浜張家浜一十九條
皆南通上海華亭縣界江之北有桑浦西渡浦表涇
東黃渡浦陸皎浦何浦上棧浦李墅浦封家浜新華
浦石橋浜上槎浦中槎浦下槎浦桃樹浦大塲浦趙
浦西彭越浦東彭越浦唐莊浦坊浜江灣浦二十二
條皆北通嘉定縣界然皆近海潮汐往來易於漲塞

其江之中段諸浦在崑山縣境者西至華翔角直潮之所至沙漲為患廣者日狹深者日淺若小虞浦在昔最為深闊而今亦漸淺狹矣夏駕道塌木瓜等浦屢浚屢塞其木瓜夏駕嘉靖初開浚之後水尚通利而道塌亦漸淤塞惟千墩一浦南通澱山湖最為闊要浦極深闊與夏駕新洋南北相望水勢相入屢經開浚皆為民利今宜沿江相度各浦之通塞浚其淤塞使湖之水必趨於江而江之水得入於海則郡中東南之水定矣又至和塘一名崑山塘西自郡城東抵崑山七十里繞城而東合新洋江經太倉州城南

入劉家港下海蓋上流自郡城南北諸水發源於太湖塘之北有大浦十九條則受陽城諸湖之水塘之南有大浦十九條則受沙湖及吐納吳淞諸水其東流赴海之勢最為迅駛東南洩水之要道不下於三江諸浦者也今新洋江之東至太倉三十里雖近海通潮塘皆深闊未足為患其崑城之東環城而西至真義浦二十餘里沙漲亦漸積而塘亦漸淺狹矣若是者並宜沿塘相視以疏決壅滯則郡東之水皆入於海而不為害矣或謂古人以開浦置閘為第一義入海諸浦皆宜置閘隨潮啓閉蓋謂江海之潮日夕

兩至早潮方退幾至浦口則晚潮復上海水渾沙迎潮復還湍瀉往來何緣減退沙漲出入難免淤積今置閘必於近江海三五里之地潮來則閉閘以障渾潮雖閘外淤積地里不遠易於浚治潮退則開閘以決水入海如是則沙漲不得入閘而浦無壅塞之患江湖之水常流而永無阻滯之虞置閘之利如此宋趙霖體究治水利害狀言之詳矣然閘之廢已久而建置興修為費不貲工力未易縱使盡建而不設官以守之雖有閘夫皆村氓執役漫無管轄朝夕啓閉豈能及時猶無閘也雖或設官而好逸憚勞因循廢事猶無官也則閘之設不能利民而反為民害矣又

夏秋之間霖雨暴漲江湖汎溢雖大浦通流尚慮不速閘口窄狹水去甚遲為害滋大是則閘之所以廢而難復者有由然矣嘉靖二年郎中林文沛曾於下駕浦口並置二閘欲以障閉渾潮意亦善矣而典守無官啓閉失時加以江流海潮往來衝擊三四年間遂以傾圮自後吳下被水論者且歸咎於閘以為障遏江流去水不疾則置閘之說未易輕議也苟能浚治沿江海諸浦以時修葺則亦何患乎水之為民害哉何謂疏導涇港蓋圩田四圍皆涇港環繞或傍江

湖或沿浦塘曰涇港者論其槩也涇港之設有公有
私今則並通舟楫分利水道旱則引其水以溉田潦
則決田之水以入涇港泄諸江湖浦塘使歸於海其
利於農田最為近裡切要所宜修舉而不可忽者也
圩田之中有浜池涇港之類不係舟楫往來水道出
入必由之所既皆壩堰使水不侵田語在治田考中
其諸緊要圍田水道通行開浚使稍深闊即取其所
開之土以築岸塍以固其本夫如是則田間之積水
可汰引於涇港涇港通流可散灌於浦塘浦塘決水
可疾趨於江海大小相資首尾相貫又何水之足患
乎夫吳郡之水皆源於震澤而震澤西通荆溪荆溪
之上溧陽有五堰以節宣歙金陵九陽江之衆水使
不入於震澤而北趨於蕪湖五堰之廢已久今衆水
皆東入震澤矣宜興之西有夾苧千所以泄長塘湖
東入瀟湖泄瀟湖入太吳等瀆由常州運河北偏十
四瀆斗門北下江陰之江今十四瀆存者無幾若常
之孟子河即孟瀆無錫之高橋即五瀉堰水猶北入
於江但諸瀆有通有塞未有能究其利若宋進士單
錡所論耳今於吳郡之東既通浚江浦以決東流之
勢於常州復修十四斗門以管水入江開夾苧千復

五堰以節西來之衆水則震澤之水深蓄安流凝然
底定其出也灌溉農田足為民利其溢也分流江海
不為民災而全吳數郡皆無水患矣大抵吳郡之水
譬諸一人之身五堰則首也荆溪則咽喉也震澤則
胸腹也三江則腸胃也浦港涇瀆則脈絡衆竅也腸
胃壅塞脈絡衆竅不通而咽喉之入不節將見胸腹
漲溢支體寢淫死亡可立待矣夫水失其治能為民
害若此為人上者可不思所以去害興利為東南保
障計乎

工計攷第六

夫治田治水皆有成法論之詳矣然所以興事而修
功者則未免動工役以勞民出計費以傷財財者上
之所惜孰肯捐不貲之費以興難必之功勞者民之
所不欲使民荷鍾操鑣胼手胝足驅而置諸江海陂
澤之間棄其營業離其室家上有暴露之苦下有督
責之勤其不樂於趨赴亦已明矣是以凡有興修率
皆因循而不舉苟簡而不備以至廢墜日甚災患日
深然猶上下相安幸其無事歲復一歲枝梧目前未
有能為國家根本之慮者以遂至於大患游仍莫能

拯救深可嘆也傳曰擇可勞而勞之又誰怨又曰因民之所利而利之斯不亦惠而不費乎又曰出納之吝謂之有司又曰以佚道使民雖勞不怨孔孟之言垂世立教為治民者律令愚以為視今農田水利之事此數言猶為深切著明在上者所宜服膺深省也昔禹之治水也命諸侯百姓興人徒以傳土功行山表木定高山大川卑宮室致費於溝洫載四時以開九州通九道陂九澤度九山其功大矣工役遍寰宇而人不以為勞計費傾海嶽而財不以為困何也其所以使之者以佚所以用之者有時也今之震澤不過

九澤之一今之揚州不過九州之一今之三吳又不過揚州一隅之地耳而議者輒以役大而費重難於施工夫果難也其視禹之時為何如其視禹平洪水鑿龍門疏九河為何如今工計之需不及禹之時萬分之一而猶以為難忍坐視斯民之墊溺而不一援手其亦不思之甚矣然工役計費二事常相須計費足則工後舉故今之言治農田水利者莫急於量財范文正公嘗計出納之費以為蘇州歲納苗米三十萬石官司之糴又不下數百萬石豐穰之歲春役萬人日食三升一月而罷用米萬五千石耳量此之

出較彼之人孰謂費軍食哉郊宜所謂制役而不勞
量財而不虐足以益國賦其論尤切今日之事就以
利為言則國家財賦皆仰給東南運河千里軸輻相
啣太倉萬閘詹積相望所須以供億軍國者胥此焉
出乃獨享其利而不知所以利之可乎且一值饑饉
下詔蠲除不過免其存留折色等項無碍錢糧而於
漕運正額顆粒無損雖遇全荒尚復熟三分以補運
額則東南之民其裨益於國家亦厚且勤矣又焉可
坐視其被害而不思所以去之乎為今之計當制其
工役之期量其計費之出使不重損於公不厚困於
民則可矣何也蓋公役之舉歲歲興修則繁而難行
數歲不治則廢而難葺故必相其工之大小而為之
制開江浚浦以十年為率疏決涇港築圩治堰歲歲
修補或間歲一葺則工役不繁而民不以為勞矣計
費之出盡仰於公則上告之悉取於民則下不堪故
必量其費之多寡而為之制若開江浚浦疏通涇瀆
之大者則官為之區畫其築圩修堰及疏決涇港之
小者則取諸食利佃作之家如此則不煩於公而不
傷於民矣然古者使民之時歲必於農隙用民之力
歲不過三日至於興大事修大功者則未嘗以此為

限故五代錢氏據有江南時設撩清之卒宋時於平江之崑山常熟吳江各置開江指揮以兵士隸之遇江浦淤塞則以時開浚蓋後有所專不妨於農也易世之後此法盡廢不可復矣至於我

朝自永樂間夏忠靖公治水以至於嘉靖改元率十餘年或五六年而一大舉每舉則役夫多至十餘萬少亦不下數萬而其為費亦動以數十萬計其役夫之法或論曰出夫或每里助役或富民雇募或糧長編僉其出銀之法或取於船料或取於餘鹽或取於丁田或取於贓罰東移西補艱難百端公私並費不一而足弘治間舉人秦慶奏請設淘河夫以為經久宣防之法主事姚文灝奏設導河夫於均徭定撥至今各縣皆徵導河夫銀然名存實亡視為不急之務其已徵在官者為有司別項應急支銷而導河夫不復雇募矣沿襲既久因循廢弛無畫一之法昧經制之宜是焉足以興大事修大功也即今東南江浦經嘉靖改元開浚之後至於今已十餘年矣其間瀕江沿海之區未免沙漲淤積語具治水考中是宜預加修葺毋使積久患滋也方今

聖天子勵精圖治如意元元每遇災傷必履宵旰之

憂屢下寬貸之詔所以惠東南之民者不為不渥也然於東南水利之事廷臣或未能盡知或知之而未
能進言或言之而未能懇切或言之雖懇切而未能詳
究其確然可興可革之跡重以司國計者或惜乎財用
而以建白為未可行任撫巡者或艱於措辦而以力
役為未易舉是以下情不能上達小民雖沾一時之
惠而未被無窮之澤良可憫也今開江浚浦工計最
為浩大其制役之法固用民之力矣愚以為不若倣
錢氏撩清之卒采世開江之兵而為之定制則役有
所專可久而不廢也竊見東南衛所其濱江帶湖者
衛則有蘇州衛太倉衛鎮海衛金山衛所則有湖州
守禦千戶所吳淞江守禦千戶所其軍士雖殘廢之
餘亦不下萬人可制為撩清開江者也或曰衛所之
設所以守備要害以衛民者也况乎沿海邊衛不時
有警安可復以開江浚浦哉是不然古者兵農一道
後世始分而為二兵以衛民民以養兵其來舊矣今
江海之區一遇盜賊生發輒以民兵當其鋒軍士惟
堅壁城守而已是民不特養兵亦衛兵矣獨不可使
為民所乎東南之地雖曰沿海然亦無他盜賊惟濱
海之民時或興販私鹽急之則或轉而為盜緩之則

為良民矣是盜賊非所虞也且須免其運糧之差令
專於本衛所分番迭休有事則使之禦備無事則督
以開江開江之時少而在衛所之曰多則亦何嘗廢
武備哉又於沿江沿浦要害之所或三四里或五六
里置為鋪舍若運河之淺鋪募貧民之壯健者每鋪
或五人或十人給以導河夫銀且視有附近荒田令
其開墾官給耕具種穀使有世業可守而居也一遇
江浦沙漲停積隨即併工開挑下令積久淤塞如此
行之既久江浦永無淤塞之患矣若夫計費之需前
所言東後西補艱難百端者是也今若制為定法以
時興修不至大壞則財亦易辦設遇大興力役之年
貲費告竭須明白開陳以請于

上或出內帑之積或減漕糧之耗以充之亦庶幾可
紓東南之患矣或者曰內帑之積安可出漕運之耗
安可減是又不然百姓足君孰與不足未有府庫財
非其財者也夫使水不為患歲歲豐稔其充內帑之
積者多矣運米耗贈固不可減然能因時制宜或折
銀解運如嘉靖十年恩詔准銀事例則耗贈所省亦
當數十萬矣夫是二者皆今之所難上有

聖君賢相又內而司國計者視國事如家事外而任

撫巡者以民心為己心則未有不成者矣

職官攷第七

王者體國經野設官分職以為民極唐虞之時禹作
司空以平水土周禮六卿之制有冬官大司空闕典
無攷先儒講論周禮以大司空之屬逸在五卿若遂
師縣師稻人草人之類是也禹之時洪荒草昧故其
任職也專周公之時治定功成故其立法也備帝王
之制為萬世程憲若此我



朝設官天率因周禮六卿之名取大唐六典之法而
參酌宋元之舊以成一代之規至為詳且備矣工部
所掌都水虞衡屯田所司可舉而言也外則東南府

縣皆有治農專官府有通判縣有縣丞使歲時循行
阡陌興修水利以利民田又每遇水災則或

勅巡撫都御史等官治水若正統間侍郎周忱景泰
間侍郎李敏天順間都御史崔恭成化間都御史畢
亨弘治間都御史何鑑朱瑄正德嘉靖間尚書李充
嗣是也或特

勅尚書侍郎等官專治水患若永樂間戶部尚書夏
元吉弘治間侍郎徐貫正德間都御史俞諫是也或
置僉事於浙江專管蘇松水利則自成化八年始若
吳瑄伍性雷是也至弘治中裁革或勅工部郎中
或主事專治水利害弘治間主事姚文灝郎中傅潮
臧麟是也至正德初裁革末年復因水災遣郎中朱
袞治水未幾裁革嘉靖初復

勅郎中林文沛治水未幾裁革迄於今仍以浙江僉
事董水利事若蔡乾江良賁蔡時田玉今朱子和是
也自弘治以來治水之官或設或罷率無定制故嘉
靖初都御史許廷光都給事中吳巖相繼論列請特
設重臣以任治水之責十一年大理寺左寺丞周鳳
和疏請設專官治水是皆深知東南水利所係不小
故惓惓焉論之於朝然莫有能舉而行之者蓋水利

之官遇水患興修固為甚急若歲豐無虞則坐享優游似為閒冗故議者輒以為不宜專設殊不知思患豫防之策要在於平居而久安長治之規實由於精習非一朝一夕之所能辦也且東南低下之區歲有水患但大小不同耳夫苟水勢不張未足為患一遇大水蕩為巨浸有司相顧束手無策然後縣以聞於府府以聞於撫按撫按會議以聞於

朝事下戶部覆議動經旬日比及奏下文移往來蘭踏災傷又復浹月徐議所以救荒之策官廩不足繼以處畫處畫不足繼以勸借比及關支餓殍已十之八九矣然後差官治水量財調役開江浚浦不亦晚乎是皆官不專設水利之法久廢一旦倉卒遇災遂不可支以至於此也或曰府縣皆有治農官非專設乎夫治農官之設固

祖宗良法美意但行之既久不能無弊職任不專或委以別務賢愚不一或雜以庸才且工力財用非所能辦不過於歲時督民脩築疏導應行故事而已又焉足以興大事脩大功也或曰巡撫都御史兼之可也夫巡撫之職固無所不統但其管轄地方廣夫政務浩繁欲其專治水利下行有司之事亦日不暇給

矣或曰今浙江僉事之設專管蘇松水利獨非專官乎是固然也但名雖專管實則兼治今治所猶在浙江歲時不過巡行一二次而已至其文移下行有司視為末務漫不加省亦不過取其依准回申而已如此而謂之專官可乎或曰即中主事昔掌差委治水亦專官也然有事則差事已則革廢置不常久暫不定又焉得為專官乎愚以為必如今日僉事之設專管蘇松水利內職則即中主事可也外臺則副使僉事可也即於蘇州建立衙門常時住劄其松常鎮嘉湖杭等府不時巡行及浙東溫台寧紹等府瀕海之區海塘堰壩成法具在無俟興脩者則但委有司管轄不必躬親往閱使得專於蘇松相時立法若前所言治田治水之事地利有緩急工程有大小次第舉行以期成效則庶為專官矣又須久任責成假以歲月毋徒苟且止辦目前三載考蹟視其勩業所就量加旌擢雖復遷官仍其舊任如此行之既久則東南之水患庶乎可弭矣何也蓋官專而地近則有司知所策勵凡有興作期於必行而無廢閣因循之弊任久而法著則下民安於趨赴凡有工役期於必成而無作輟偷惰之虞是則專官久任為今日水利之急務

如此其所以量才而授任者則在於持鈞衡者焉

崑山水道源流攷第八

崑山蘇州鉅邑也直郡東七十里秦漢時名婁縣以縣有婁江故名今縣南九里吳淞江即古婁江也婁江禹貢三江之一即史記上義所稱太湖東北下三百餘里入海曰婁江顧夷吳地記所稱東北入海者曰婁江是也蘇州之水皆源於太湖而流於三江以入海太湖在吳縣西南五十里崑山在吳縣東北三江入海之道經焉然崑山境內水道又分而為三大率皆源於太湖也東南境之水自太湖口東流出吳江縣之長橋曰松江又東北流入長洲界過大姚浦

入崑山界江分為二南為吳淞江北為勦娘江下流
合而為一實皆吳淞江也東流過崑山南又東南流
入嘉定界及松江之上海界東入大海其入海處在
昔皆崑山地後分為嘉定又分為華亭華亭分為上
海故崑山為三江要道也西境之水亦自太湖分流
光福胥口吳縣鮎魚口東北流經郡城之婁門東流
入上雉瀆下雉瀆沙湖直抵崑山七十里曰至和塘
一經崑山城南一經崑山城中至東門合流入太倉
塘三十五里至太倉南城入劉家河百里下海東北
境之水亦自太湖東北流入上雉等瀆北匯為陽城
湖東為傀儡蕩入新塘吳塘分流至太倉境入海陽
城湖又北為巴城湖東入新塘濶漕北入七浦塘至
七鴉浦下海此崑山諸水入海之大道也吳淞江之
南有陳湖趙田湖澱山湖度城湖盛蕩雙洋蕩白蕩
朱窠瀆吳淞江之北有陽城湖包湖巴城湖傀儡蕩
雉城湖馬涇湖鰻鱧湖栢家瀆大泗瀆此縣境江湖
受水之大者也吳淞江南北兩崖各有太浦以通於
諸湖瀆其在本縣境者江之南自東徂西為大浦者
十有八石浦道謁浦蕭市浦金窰浦千墩浦注浦張
潭浦棠梨浦同丘浦謂天浦張浦柁歸浦角直浦甫

里浦渡頭浦東齊浦剝力浦界浦皆南受陳湖等湖
諸水以通於江而東入大海江之北自西徂東為大
浦者二十有六界浦真義浦黃瀆浦薛莊浦平樂浦
心瀆浦華翔浦梁里浦尤涇浦大虞浦小虞浦馬仁
浦新洋江社城浦廣浦天明浦夏駕浦木瓜浦顧幕
浦金城浦三林浦瓦浦北澥浦徐公浦安亭浦顧浦
西則受陽城諸湖之水南絕至和塘以通於江而馬
仁浦之東天明浦之西有新洋江比諸浦為最大又
北受鰻鱧諸瀆之水以通於江而東入大海北沿江
縱浦之大者也江浦之間通流涇港其數甚多江之
南曰全吳鄉泖川鄉其在全吳鄉者則有曲塘浪浦
下張浦顧仙浦漁漣浦甘子浦趙浦新漕浦東宿浦
西宿浦張漫浦管涇季星涇界涇大慈涇潘昌涇郡
涇徐涇張沼涇新涇合塘港黃涇港山涇港弋家港
其在泖川鄉則有石塘曲塘古塘磧磯塘橫涇塘小
石浦陸虞浦湓浦善浦牛脊浦烏墩浦若里浦王墓
涇白段涇滂學涇莊磯涇揚搶涇泖涇黃泥涇坊巷
涇寺巷涇小錢涇陶墩涇王土涇方盛涇八千涇寺
涇廟涇度城涇張涇大漕港小漕港平林港潮山港
以上二鄉之水皆經緯江南諸浦受陳湖澱湖等湖

諸水以入於江者也至和塘南北兩崖亦各有涇浦
其在本縣境者塘南之浦自西徂東則有界浦朱塘
浦真義浦戴墟浦黃瀆浦平樂浦新瀆浦尤涇丁涇
大虞浦小虞浦皆南通吳淞江塘北之浦自東徂西
則有小虞浦大虞浦白馬涇壅里涇尤涇高墟涇真
義浦諸昌涇界浦皆北通陽城湖傀儡蕩雉城湖巴
城湖諸水太倉塘兩崖亦各有涇浦其在本縣境者
塘之南自西徂東則有新洋江裔子河古婁涇古塘
泥塘吳塘皆通吳淞江塘之北自東徂西則有吳塘
黃泥涇泥塘清水港金鷄河漢浦塘新洋江稍夾潮

塘皆北通鰻鱧湖等壤貫新塘瀾漕東流入揚林七
鵝等浦者也至和太倉二塘並在吳淞江之北陽城
諸湖之南崑山縣當其中曰積善鄉在縣之近郊其
涇港之大者則有橫塘針浦戴浦秦浦須浦溢瀆浦
新漕浦李箕浦字祿浦熊莊浦老鵝浦浪墅浦逸鍾
浦潭市浦朱明浦莊浦葛浦曹浦廣浦馮浦韓浦丁
丁涇陳段涇聰明涇丁涇景涇許墓塘顧墓塘山塘
黃昌涇龍涇雙涇牛尾涇黃墓涇白馬涇陳墓涇潘
涇邵黃涇湖涇石人涇吳涇斜涇丁澤涇梅星涇白
塔港斜港茆沙塘葑塘六和塘櫻桃塘婁縣上塘孝

義塘四塘在縣南者則通江北諸浦在縣北者則通
新塘瀾漕七浦塘者也縣之西通至和塘塘之南即
吳淞江之北曰朱塘鄉其涇港之大者則有景浦蔣
浦韓溪浦東西羅浦石樞浦淙浦趙浦顧市浦刁涇
華家涇張巷涇全吳涇楊巷涇武城東西港蕭港皆
西通界浦南通小虞浦者也塘之北亦曰朱塘鄉其
涇港之大者則有狀元涇駙馬涇雉城涇聖王塘古
塘官塘師姑涇鰻鱧涇施澤涇黃苗涇溫焦涇斗門
涇姚黃漕龍涇五千涇三千涇倉涇殷涇張涇黃蘆
涇羊丫涇羅庄涇朱舍涇大渭涇新涇廟涇相涇橫
涇光涇皆西通陽城湖巴城湖傀儡蕩雉城諸湖以
東入新塘瀾漕七浦塘以東入于海者也吳淞江東
段之北曰武元鄉永安鄉其涇港之大者武元鄉則
有郭澤塘茹律塘王孝塘車塘胡浦白雉浦墅瀆浦
張鹿浦北弓浦夏侯浦瓜瀆浦市浦黃墩浦茅老浦
宋浦平巷浦徐浦城進浦錢涇邵莊涇橫涇黃鄒涇
楊閭涇小蔣涇陳從涇彭段泥橋涇木葉涇廟丫涇
獨兒新豐涇馬新涇陳顏涇陸巷涇汪莊涇 涇馬
塘涇菱段涇顧鼻涇白西段涇東楊涇四段涇新涇
葑涇郭涇趕涇戴涇趙涇莊涇李涇甲涇何涇巷涇

腰涇永安鄉則有朱景塘鷄鳴塘王孝塘郭澤塘漕塘橫塘黃墅塘小瓦浦潘縣浦須浦陳連浦白慎浦鴨善浦北陳浦白鶴浦武桑浦肩浦鄒浦蔡浦彭浦沈浦蔣浦姚浦楊浦寃浦盧浦金浦嚴莊涇張師涇陸家渙木瓜涇西四涇西六涇蔡墓涇中城涇石丁涇官路涇新開涇朱洞涇馬湖涇連水涇泗橋涇陸渚涇安亭涇朱村涇據莊涇交段涇薛家涇田淩涇若塾涇南交段涇鰍洞涇流浪涇東西潘涇丁魚涇謝湖涇牛洞涇韓村涇塘子涇莊墓涇董段涇螺螄涇朱至涇潮庭涇黃丁涇寺涇乙涇北涇談涇蔡涇馬涇丁涇刁涇全涇戈涇汗涇鮑涇吳涇陸涇朱泗港皆西通新洋江東通安亭浦顧浦者也太倉塘之南北曰惠安鄉其涇港之大者則有行孝塘古塘郭澤塘茹律塘新塘官塘白苧浦夾浦中趙浦南北趙浦郊湖浦莊涇中路涇徐夏公涇張烏涇茭門涇錢涇杭涇朱家涇斜涇新涇盛涇時涇葑涇港涇吳家涇橫涇歷塘涇枯竹涇廟涇鳳涇混泥涇邵涇燕涇黃涇宋家港鴨脚洪在塘之南者則通夏駕瓦浦以南入吳淞江東入劉家河石塘之北者則北通吳塘揚林塘七鴉浦以入海者也凡此皆崑山合境水

道通流古今著名者其他若民間開創或便舟楫或
畧圩田小小涇洑之類不與焉崑山之地東西不過
六十里南北不過百里而江湖塘澤所占十之四五
民田大約得萬頃皆錯置江湖塘澤間以故數受水
患其浚源導流以興利去害為民造福為
國家根本無窮之計者則深有望於今日也



